

岫巖志略卷八

人物志

仕宦

文學

懿行

節烈

聖人久道化成山川鍾靈毓秀十室之邑必有忠信而況不止十室者乎第建邦未久乾隆以前之人物率溷跡於鄰疆徵文考獻其人其事茫乎無憑僅就耳目所及者寥落數人殊形譾陋然無其實而高乎其名粉飾虛譽妄相附會斷非操管者所敢出也若者爲名德若者爲文學若者爲卓行奇節揚前徽即以風後人也烏得而忽諸志人物

仕宦

樸懷玉字孟珍遼東東寧衛人蔭生德安府同知康熙戊申春署雲夢縣事體度端嚴卑以自牧寬以御衆賦役不擾民自樂諭諭民息訟雀鼠屏跡修飾黌宮優禮學校續成縣志撰詩餘四調以勸四民翕然向風焉

湖南雲夢縣志

謹按東寧衛係鳳凰城故疆詳見名宦方嵩張良佐傳後

劉珩字蘊山世居邑南青龍山以進士出宰雲南治績卓著有能吏名初權昆陽素號繁劇案牘塵積下車伊始力行摘案法判決如流攻訐之風以息捐廉新學宮修書院申明講學條規人文蔚起戊子充雲南鄉試同考官賞鑒多名宿繼攝平彝邑澆瘠多貧民歲課不登心憂之日循行阡陌相其地之宜農宜桑者殷勤勸課因婦女不習女紅爲頒紡織之具於里社俾遠鄉民皆效之行朞年桑麻遍野機杼連宵民始知有生之樂旋補蒙自調昆明蒙自爲滇省大缺乃大憲調劑意也獨不以介於懷性慷慨喜揮霍稍有贏餘輒濟貧乏任肥秩數年清風如故昆明係首邑事上臺率僚屬理繁治鉅興利祛弊事難指數去任之日士紳賦詩贈行編次成帙名曰扳轅集廣西州河功書院立有生祠其齋錦屏送衣織者所在不乏因卓異陞永平廳同知桂總制復專摺保薦兼有獲盜功蒙召見天顏和霽溫

語久之記名以知府用以憂未赴補移署甘肅河州適鄰境番夷知
事奉委督兵役擒治捕獲二百餘名但戮首惡其無辜而被脅從者
分別省釋番民帖服補鹽茶廳同知權知鞏昌府特授湖北遺缺知
府未抵任卒聞者惜之

于因號松嚴居城之北鄉性嗜讀積年攻苦每文宗試必居首列由
優貢生考補宗室營教習授縣尹歷署直隸博野等縣實知廣平縣
縣素澆隻身赴任清苦自甘一介不枉取不善趨承而喜接文學士
以振興文教爲務每月集生童考課細加丹黃殷殷獎勸遇文士爭
訟輒講解文藝幾忘所訟爲何事訟者亦感悟寢息勤於治事案無
留牘值歲祲亟請賑卹具尺籍手自檢校吏胥無能行其私因公下
鄉必攜乾餼自隨不絲毫累民丁內艱哀毀成疾卒於保陽歸柩過
縣赴弔者雲集宦橐蕭然惟萬民衣織堆積如許

曲致誠號來溪邑北四道河人與于因同時宦跡亦與因略相等初

宰直隸景州以憂去服闋改官雲南歷任師宗禹州等州縣性慈善
不輕用刑徭民雜處加意調劑四境靜謐無譁作令數年衣冠樸素
與當日寒儉景象無異解餉赴蜀因病回籍卒於家

文學

多隆阿號震溪滿洲正白旗人居英那河里幼聰穎讀書過目不忘
殫心考據之學天文數術星經地志凡百家言無不備覽弱冠補博
士弟子員屢試優等食餼道光乙酉選拔第一試秋闈薦而不售遂
絕意進取吟詠自娛晚年喜談青鳥術判別諸書異同講解入微名
理燦然南北堪輿家無不奉爲圭臬性清介不趨榮勢與人交必本
至誠素與曉楓何太守同年交厚何守山西平陽再三招致因參其
幕兼教書院生童學者爭趨赴之咸豐辛丑八月粵匪圍平陽時倉
卒無備額設兵已奉調四出武弁畏縮不前乃爲何某練鄉兵守城
號令嚴明夙夜不懈適賊以巨礮轟城城破何遇害隆阿手一編意

氣自若賊脅之不爲動亦遇害事聞恩賜世襲雲騎尉子庠生裕深襲職有女年幾五旬知書通內經奉母以居不適人

王際清字渭川青堆子西鄉人附貢生性敦樸務實學經史子集皆考核精確雄於文語語有根柢屢膺鄉薦不獲售遂灰心仕進教授生徒師法嚴而善誘邑之文士多出其門嗜飲有招致者必盡醉高唱大江東以去至老貧甚廣平令于因其高足也千里往投抵廣平三日病歿因厚歛之歸其喪

許文運號鳳樓城東南木耳山人世敦詩書賦性高古不營世務屢應童試不售而沈酣經史至老猶篤猶耽吟咏著有澣東詩鈔子弟遊庠食餼貢成均舉鄉榜者不下二十人率皆錚錚有聲知其淵源有自也

懿行

李謙原名秉信號益葦初居蓋平幼貧年十六充刑吏稱能痛父

南遊不歸間關數千里往尋之奉二親居於岫遂入籍爲倉吏倉米折徵向有常額值歲祲擬減三之一以恤人邑侯不許再三請之怒約以身代償怒稍解顧數千金非能猝辦竭力摒擋繼以典質獲數百金以進邑侯感悟笑置之由是邑民不致重困嘉慶十五年大水民饑甚乞食者趾錯於門因計其人以次飯之日十餘炊不憚煩遇衰老者解衣衣之客死者施給葬地不喜佛法而遇緇流羽客必厚其施每值歲暮必齎米肉以享里中之貧乏如是以爲常邑北有黃嶺徑險甚屢覆車傷人或議覓術士以禳之不從獨爲之鳩工集役竭資以坦其途尤篤友誼有二三老友核所負逾千金中有饒足者家人欲相索厲詞阻之終其身未嘗過問有王某者素友善與錢通未嘗錙銖較後以居相左迹稍疎適遇某之比鄰詢之某已故家計中落亟詣其居謂其子曰曩負若父金知之乎答云不知曰吾今償若息幾何其子愧謝曰本且不知息於何有再三推讓不允卒倍償

之家人嘗驅車過分水嶺遼境也嶺險峻車重載日薄崦嵫風雪交迫輿夫窘甚忽有聯臂踉蹌而來者乞丐十餘輩喝問爲誰以實告羣丐喜曰得非李善人乎吾儕受惠久矣齊助以力推之挽之履危途如平地酬以錢不受而去生平無嗜好惟以積善爲心課子嚴耕且讀不與聞外事年七十五考終子翰穎孫宗太俱以教習授縣令遊庠者數人

莘農黃贊湯填諱

董文燿字益昌成均上舍生先世爲順天豐潤縣人詩書舊族文燿幼年隨父兄遊學於岫遂家焉爲人善心計習懋遷居積致富性亢直與人交不苟然諾喜周戚里嘉慶十五年大水饑民絡繹於道乃設粥廠躬親監視授食必均全活無算城西數里有琵琶嶺徑險惡行人每逾其途心傷之出資修鑿至今稱康衢通醫理尤喜爲形家言不問貧富求之輒應不受謝子四長百齡出知山東聊城縣仲夢齡乙酉選拔戊子舉人工部營繕司員外郎季嶽齡庠生族中讀書

成名者甚衆

張 煦字泰和歲貢生選授直隸鉅鹿縣訓導不就設帳授徒城居數十年片紙隻字從未一入公門子壻夏雲岫由縣尹薦陞按察副使累任美秩疊次邀致終不赴年七十餘以壽終

吳彭翰邑之西鄙人事母孝母病長齋虔禱不愈母歿廬墓三年道光辛卯同社生聞其事於學使次年遊庠

沈 璉庠生士子之叔年四十喪耦不再娶鄉里爭訟必善言排解家和鬻無喧競者年九十七以壽終

谷繼可號文明祖籍山東文登縣人乾隆丁丑進士貴州都勻協右營遊擊賢生之孫值歲祲遷居於邑之仙人嘴隱居務農家不甚豐而篤於爲善性恬淡不苟葷酒喜放生雖螻蟻之微必加護惜每歲製棉衣數十事遇乞人之衰老可憫者預委路側以待其取若爲行路以所遺者不使人知也居里近琶古嶺嶺之南有巨壑險且隘行

者苦之繼可鑿石爲橋獨力營建工堅而久道途之偏仄泥淖者必隨時修葺數十年如一日凡諸善行皆編爲俚歌以勸人不欲獨爲君子也年八十餘以壽終

孔興祿字在中宣聖六十五代孫也性醇厚喜賙貧乏尤敦族誼嘉慶十五年歲大饑族人銘毓年未弱冠自山左流寓於邑之南鄉墮入僕籍興祿贖還資以田代具采禮爲聘良家女未娶而卒復爲納聘今已立室家子孫林立矣又族人傳正者幼孤田產爲匪人乾沒興祿力爲釐剔如數珠還數十年無外侮凡族人聞風而來者皆如其意以去遇鄉里紛爭居間者數十皆不得當得興祿一言而解年六十八以壽終戚里痛惜之會其喪者數百人

潘克文之父某世業農持家儉約而喜賙貧乏每乞者至門各加意撫恤之數十年不倦某歿乞者歛資致祭不期而會者百餘人鄉里感歎以爲僅事

節烈

旌卹之典所以勵名節而敦風化甚盛事也第窮鄉僻壤不諳年例往往遲疑不敢呈請以岫邑之大貞女節婦何可勝數而翻閱塵牘其得邀旌典者曾無幾人致使貞操勁節竟同蔓草荒煙非惟負朝廷寬大之恩亦且失宅里表揚之誼豈非憾事茲特錄部文一通綴於篇首俾閱者咸知例意所在以便遵行未始非激風勵俗之一助耳

道光四年十一月二十二日內閣抄出禮部謹奏爲請旨事查定例守節之婦自三十歲以前至五十歲或年未逾五十而身故其守節已及十五年者俱准旌表又未婚貞女舊例按照年限彙題請旌與節婦例同續於乾隆三十六年題准凡直省貞女未符年例而身故者其完全節操與白首完貞無異改爲不拘年歲一體准旌又凡節婦貞女臣部每屆年終具題一次歷經遵辦在案現在臣部辦理彙

題節孝查有安徽巡撫具題全椒縣民婦王楊氏自二十七歲守節於道光三年身故守節十三年按照成例計少二年照例應行扣除惟念該民婦矢志守節已逾十年堅貞之操自可信其靡他具查冊開事實實係事姑孝謹苦志撫孤身故之後徒以格於定例不獲邀綽楔之榮情殊可憫伏念節婦貞女事情略同已故貞女不拘年限俱准請旌已故節婦必待歷十五年之久方準旌表誠恐苦節早天者徒以年限稍有未符不得仰邀鉅典未免向隅再查現在節婦自三十歲以內守節至五十歲計守節二十年以上者即屬合例其身故而未及年限者特其生之不幸非其節之有虧似宜酌量減半以昭平允臣等公同核議合無仰懇聖恩俯准將已故節婦守節年限改照現存節婦二十年例限之半定爲守節十年准予旌表以示限制而廣皇仁是否有當伏候訓示遵行爲此謹奏 奉旨依議欽此

張氏王宣明之妻武生沛之母武生湧之伯母也年二十八夫歿沛

三齡撫孤事翁以壽終殯葬如禮道光元年年七十旌表

閻氏高琪之妻武生高珽之嫂年二十六夫亡繼姪鴻川爲嗣事翁姑以孝聞撫嗣子如己出道光元年旌表

趙氏宋珍生之妻武生廷瑚之母監生廷弼舉人廷樞之伯母也年二十九而寡廷瑚甫周歲事姑課子孝慈兼盡道光元年旌表

孫氏劉鴻福之妻年二十八而寡子德棠甫四歲孀姑年近八旬氏矢志守節孝慈兼盡道光元年年八十一旌表

紀氏監生王欽之妻武生際起之母附貢生際清庠生際泰之伯母候選教諭爾釐之叔祖母也結褵無幾欽病歿氏年二十五際起甫三歲藐孤在抱尊章衰老氏屏鉛華潔甘旨敬養周至鄉里以孝稱教子慈而嚴動止必繩以法雖霽顏溫語而意凜如也族中無少長待之具有恩禮鄰里賤嫗從不以聲色相向守志數十年飲冰茹雪而處之坦然道光元年請旌如制時際起年已望六念母氏苦節竭

資建坊躬率工役登山鑿石爲石傷股成疾弗恤坊成遍集文士撰聯題額綽楔巍然工費鉅萬東都坊表此爲極觀邑之人每以坊名其里焉年八十九壽終崇祀海城縣節孝祠

王氏田大國之妻王國福之女年二十八夫歿子碩秀甫七歲撫孤事親孝慈兼盡道光十年年七十一旌表

姜氏儒童郭天成之妻禮部主事薦升山西平陽府知府何維墀之表姪婦年十九夫歿閱三月生子毓笏氏孝事翁姑慈撫幼子道光十四年維墀呈請旌表

崔氏崔德舜之女張廷義之妻生員國輝之族弟婦年二十九夫亡子毓秀甫三歲矢志守節撫孤成立道光十四年年六十八旌表建坊於小廟子

譚氏譚德貞之女王槐之妻生員璋之弟婦年十七于歸二十四而寡子在泮甫四歲時翁姑皆浮厝氏擇吉營葬哀禮兼盡課子成立

道光十五年旌表建坊於將軍石

黃氏黃廷仕之女年十七歸金會芳二載夫亡子毓嘉甫二齡苦志教子事姑以壽終殮葬如禮道光十五年旌表

宋氏宋廣玉之女沙三緘之妻生員保德之堂叔母年二十一于歸五載而寡繼姪上中爲嗣孝事翁姑慈撫嗣子道光十五年年七十九旌表

薛氏薛廷良之女孫承先之妻工部員外郎董夢齡之伯岳母年二十三于歸六載夫亡子延緒甫四歲事翁姑撫幼子孝養兼至道光十六年年七十夢齡呈請旌表

遲氏遲名山之女年十七歸田文德二十四而寡姑年九十奉事無缺課二子成立道光十九年年六十八旌表

魯氏魯文之女于潤久之妻翼學教習于大觀之嫂附貢生亮久監生瀚久瀚久之堂嫂年十九于歸二十一而寡繼姪際楨爲嗣事翁

姑以孝聞道光二十三年旌表建坊於橫河子

周氏周德禮之女年二十歸邱廷柞二十三而寡繼姪國林爲嗣姑以壽終翁年九十餘燾瀾秩膳殷勤倍至撫嗣子成立道光二十七年旌表

孫氏孫士禮之女年十七歸肖玉山二十八而寡孝事翁姑撫二子信傑俱成立道光二十七年年七十八旌表

宋氏高璠之妻恩貢生石峯之叔母十九于歸九載夫亡子鴻飛甫五歲矢志撫孤道光三十年旌表

魯氏魯鳳山之女王承邦之妻生員象乾之祖母生員朝臣之曾祖母年二十一于歸二十五而寡繼姪祿爲嗣孝事翁姑慈撫嗣子道光三十年年八十四旌表九十餘壽終

高氏于庭之妻高有爵之女恩貢生高石峰之姑母也年二十于歸二十五而寡事翁姑以孝聞撫孤成立咸豐元年旌表

梁氏梁儀之女年十七歸王家豐二十七而寡繼姪俊聲爲嗣事翁姑以孝撫嗣子以慈咸豐六年旌表

婁氏婁恭之女年十九歸高不德二十六而寡遺一子甫周歲氏矢志守節閱三載子染疹殤姑以病歿氏之族人爲翁繼娶舉一子不忠生子氏繼爲嗣撫如已出及翁以壽終殯葬如禮氏奉事繼姑教誨嗣子孝慈兼盡咸豐六年年五十八旌表

王氏鄒培林之妻武生鄒宏祥之媳附貢生王彤之孫女增廣生際會之女議敘從九品汗如之姊也年十九于歸二十四而寡無子僅遺三女姑年七十餘奉事維謹三女各適所天咸豐七年旌表

叢氏叢希舜之女董士鏞之妻朝城縣知縣百齡之媳工部員外郎夢齡之姪媳監生熙元之堂嫂也十七于歸二十一而寡子起汗甫二齡翁宦遊山左祖母老病惟氏殷勤侍奉迨祖母暨翁姑壽終俱殯葬如禮課子成立咸豐七年旌表